

Lyon, pour la grand'amour, affection et singuliere devotion quelle avoit a monsieur saint Francoys et a madame sainte Clere, vierge, et leur a fait de grandz biens ; et, en derniere volonte, ordonna que plus grands leurs fussent faitz et aussy aux cordelliers de Villefranche en Beaujolloys.

Et parceque mondit seigneur Guichard, connestable de France, qui estoit filz de Humbert et de madame de Baugy, comme dict est, n'eust aucuns enfans descendans de son corps, madame Ysabeau de Beaujeu, sa seur, luy succeda en la seigneurie de Beaujolloys. Ladite Ysabeau estoit femme de Regnault, compte (*sic*) de Foretz ; et d'icelluy Regnault eust deux enfans masles, cest asseavoir Guyot et Loys. A Guyot demeura pour son partage la comté de Foretz, et a Loys la baronnysse, terre et seigneurysse de Beaujolloys, lequel en pourta le nom et les armes.

Ledit Guichard mourut luy estant en ambassade en Angleterre, envoyé de par le roy de France.

Le doyen de l'esglise collegiale de Saumur, prez de Marcigny les Nonnains, dit que ladite dame Ysabeau de Beaujeu fonda ledit college de Saumur, elle estant contesse de Fourrestz.

Mon seigneur Loys de Beaujeu, seigneur de Beaujolloys, fut subsequemment connestable de France, comme appert par un epitaphe ancien, estant sur le tumbau de messire Loys de Beaujeu, son frere, a la main senestre du grand autel de Notre Dame du bourg de Obz, au diocese de Bourges, lequel se intitulle seigneur de Montferrand, frere dudit Loys de Beaujeu, seigneur de Beaujolloys, connestable dessusdit.

Ledit seigneur Loys de Beaujeu, connestable de France, espousa dame Helienor, seur Amade (1), aultrement dit, selon les histoires, conte de Savoye, de laquelle il engendra

(1) Amé.